

'Jangan sukarkan pemberi maklumat rasuah'

Kuala Lumpur: Badan Peguam Malaysia mencadangkan supaya Akta Perlindungan Pemberi Maklumat 2010 (Akta 711) dipinda supaya individu yang tampil awal, secara sukarela dan jujur harus diberikan perlindungan terhad dan bersyarat di bawah kawal selia yang ketat.

Presiden Badan Peguam Malaysia, Mohamad Ezri Abdul Wahab, berkata peruntukan di bawah akta sedia ada dilihat menjadikan pendedahan maklumat sangat sukar.

Beliau berkata, antara cadangan penambahbaikan ialah akta itu wajar lebih fleksibel berhubung kategori individu yang layak dilindungi, termasuk mereka yang mungkin terbabit secara sampingan dalam salah laku tetapi bukan dalang utama, selagi pendedahan mereka dibuat dengan tujuan membongkar ketidakpatuhan atau penyelewengan.

Selain itu, katanya, niat atau motif di sebalik pendedahan itu tidak seharusnya menjadi alasan utama untuk menafikan perlindungan kerana fokus utama un-

dang-undang berkenaan adalah memastikan maklumat mengenai salah laku dapat didedahkan tanpa rasa takut terhadap tindakan balas.

"Bendekatan sebegini adalah penting untuk menggalakkan lebih ramai tampil, sekali gus meningkatkan ketelusan dan integriti dalam sektor awam serta swasta," katanya.

Beliau berkata, ia akan mewujudkan perasaan saling tidak percaya sesama mereka yang melakukan salah laku kerana tahu undang-undang boleh melindungi pemberi maklumat.

"Apabila melakukan salah laku, tidak boleh dibiarkan kepercayaan sesama sendiri wujud, sebaliknya semua yang terbabit perlu selalu berasa sangsi bahawa segala salah laku mereka akan terbongkar, dibongkar oleh orang yang terbabit kerana mendapat perlindungan," katanya.

Mohamad Ezri berkata, walaupun akta itu pernah dipinda bagi meluaskan skop, tetapi ia tidak mencukupi kerana dalam

kes rasuah, perlindungan yang lebih luas patut diberikan pemberi maklumat.

"Jika undang-undang tidak memberi perlindungan secukupnya, orang ramai memilih untuk berdiam diri dan kesalahan besar akan terus tersembunyi.

"Objektif perlindungan adalah bagi menggalakkan banyak laporan dibuat bagi mencapai objektif pencegahan. Cadangan pindaan akta ini bertujuan memperkuh usaha memerangi rasuah, bukan untuk mempertahankan mana-mana individu," katanya kepada *BH*, semalam.

Semalam, Ketua Pesuruhjaya Suruhanjaya Pencegahan Rasuah (SPRM), Tan Sri Azam Baki berkata ahli perniagaan, Albert Tei, yang didakwa di Mahkamah Sesyen Kuala Lumpur atas kesalahan memberi rasuah kepada bekas Setiausaha Politik Kanan Perdana Menteri, Datuk Seri Shamsul Iskandar Mohd Akin, tidak dilindungi di bawah Akta 711 kerana akta itu tidak me-



Mohamad Ezri

lindungi individu yang turut terbabit dalam salah laku jenayah.

Azam berkata, untuk mendapat perlindungan dalam akta itu, seseorang tidak boleh mendedahkan maklumat mengenai aktiviti jenayah dan kemudian memohon perlindungan.

Peguam Albert, La-theefa Koya pula berkata, penahanan anak guamnya oleh SPRM adalah tidak wajar kerana lelaki itu didakwa pemberi maklumat dan bukan penjenayah.

Beliau berkata, anak guamnya itu mendedahkan maklumat mengenai seorang pegawai tinggi di Sabah, namun mendakwa tiada tindakan diambil selepas hampir setahun laporan dibuat.

Mohamad Ezri berkata, Majlis Peguam pernah menghantar cadangan mengenai penambahbaikan akta itu kepada kerajaan, termasuk membabitkan aspek perlindungan saksi, justeru berharap ia dapat diteliti kerajaan.

Akta 711 dikuatkuasa pada 15 Disember 2010, bertujuan meme-

rangi rasuah dan salah laku lain, dengan menggalakkan dan memudahkan pendedahan kelakuan tidak wajar dalam sektor awam dan swasta.

Ia juga bagi melindungi orang membuat pendedahan itu daripada tindakan memudaratkan, termasuk tuduhan di mahkamah.

"Jika undang-undang terus menafikan perlindungan kepada sesiapa yang ada kaitan, walaupun bukan dalang utama, orang ramai tidak akan berani tampil ke hadapan.

"Perkataan *wilfully* yang dimasukkan dalam pindaan baharu membantu sedikit, tetapi tidak selesaikan isu apabila perlindungan masih bergantung sepenuhnya kepada budi bicara agensi.

"Motif juga terus menjadi faktor yang boleh menafikan perlindungan. Seksyen 11(1)(e) tidak diubah, yang bermakna pekerja membuat laporan kerana takut tindakan majikan masih tidak dilindungi.

"Ini bertentangan dengan prinsip asas perlindungan pemberi maklumat, iaitu memastikan maklumat mengenai salah laku dapat didedahkan tanpa rasa takut," katanya.

